

APUSTUL SAN PABLUM KAY KARTATA KACH'ARQAN

FILIPUS LLAQTAPI TIYAQKUNAMAN

(FILIPINSIS)

¿Pitaq karqan San Pablo? Liyishun chay punta parti Rrumanusta, masta yach'ananchiq *San Pablupaq.

¿Pikunapaqmi iskibrirqan kay librutaqa? Pabluqam iskibrirqan Filipus llaqtapi tiyaq kriyiq masingunaman. Filipusqam *rrumanukunapaqqa ancha baliq llaqta karqan. Chay llaqtaqam *prubinsya Masiduñapi karqan. Chayman Pabluqa rishpa, *Jisukristupa shumaq nutisyanda yach'achikurqan. Masta yach'ananchiq chay filipusinu kriyikunapaq, liyishun Ichus 16.6-40.

¿Imaraykum iskibrirqan kay librutaqa? Pabluqam karsilpi karqan. Chaymi chay Filipuspi tiyaq kriyiq masingunaqa chaypaq yach'ashpa, munarqanllapa yellaywan ichu suq laya kusaskunawan Pabluataqa yanapayta. Chaymi Ipafrudituta Pabluman kach'arqanllapa, chay kusaskunata apanambaq. Chaymadaqam Pabluqa kay kartata iskibrirqan, chay filipusinu kriyiq masingunata ancha pagikunambaq, chay rrigalukunata kach'ashqanllaparayku. Paykunataqam animachirqambis, Jisukristupi ancha allita kriyinanllapa. Chayshina iskibrishpaqam, Ipafrudituta kach'arqan, kay kartata apananllapa filipusinu kriyiq masingunaman.

¿Imapaqmi yach'achiwanchiqllapa kay libruqa?

Filipinsis 1.1-11; 4.10-23 niwanchiqllapa, Pablo filipusinu kriyiq masingunata ancha pagikushqambaaq, Dyusman paykunapaq ancha mañakushqambaaq.

Flp. 1.12-30 niwanchiq, Pablo karsilpi kashpapis, yach'arqan: Suqunam Jisukristupaq yach'achikuykanllapa, nishpa. Chaymi ancha kushikurqan. Niwanchiqpismi, Jisukristupi kriyishpaqa, ancha ñakashpapis, ama disanimakananchiq.

Flp. 2.1-18 niwanchiq, Jisukristushina umildi kananchiqllapa.

Flp. 2.19-30 niwanchiq, Timutiyu, Ipafruditu Pabluata ancha yanapashqambaaq.

Flp. 3.1-4.9 niwanchiq, Jisukristuta yuyayninchipi riqsishpa, allita kasunanchiq, ama pilyanakunanchiq, ashwan kushikushpa kawsananchiqllapa.

Pablum napaykurqan filipusinukunata

1 ¹Kuyashqay kriyiq masitakuna, noqa Pablum masanchiq Timutiyuwan Jisukristupa sribikuqniñ kanillapa. Chaymi kay kartata

kach'amuni qamkuna Filipus llaqtapi tiyaq kriyiq masiyunaman. Chaqa qamkunaqam Jisukristupi allipta kriyishpa, Dyuspa wambrangunana kangillapa. Chaymi *ubispuykikunata, *dyakunuykikunata, yumbay

qamkunata napaykuykillapa.

²Mañakunim Tayta Dyusman, Siñurninchiq Jisukristumambis, tukuy imapi qamkunata yanapashunan, ama nimata manchashpachu, ashwan kushikushpa kawsanaykillapa.

**Pablum Dyusman mañakurqaq
kriyiq masingunapaq**

³Kriyiq masitakuna, kada bwilta qamkunata yuyashushpam, Dyusman ancha pagikuni qamkunapaq. ⁴⁻⁵Kanan qamkunapaq Dyusman mañakushpaqam, ancha kushikuni. Chaqa Jisukristupi kriyishqayki diyamandapacham kanangaman qamkunaqa ancha yanapawashqa kangi, *Jisuspa shumaq nutisyanda yach'achikunapaq. ⁶Kanan allitam yach'aní: Tayta Dyusmi qamkunata yanapashushqa, paypi kriyishpa, pay munashqanda ruranaykillapa. Chayshinallam mana shaykuq rin yanapashuqllapa, mas allita mas allita pay munashqanda rurashpa, kawsanaykillapa, Jisukristu shamunan diyakaman. ⁷Chaymi ancha balin, tukuy shunqo qamkunata kuyashunapaq. Chaqa kay karsilpi kaptiy ichu libri kaptiyipis, qamkuna ancha yanapawangi, kuyawaqchinchiq Tayta Dyuspa shumaq nutisyanda awturidarkunapa ñawpambi yach'achikunay: "Kay nishushqayqam allip", nishpa. ⁸Kanan Tayta Dyusmi yach'aní: Churiy Jisukristu yanapaptinmi, Pabluta tukuy shunqo filipusinukunata ancha kuyan, nishpa. ⁹Chaymi Dyusman mañakuni, chay ancha kuyakushqaykimanda masta kuyakunayki, allita Dyusminda yach'akushpa, ancha yach'ayniyuq kanaykillapa. ¹⁰Mañakunipismi, ancha allita yach'anaykillapa, imam alli, imam mana allichu, nishpa, Jisukristu shamuptin, ama nima uchayuq kanaykillapa, ¹¹ashwan Jisukristu yanapap-

shunan, yumbaya allita rurashpa kawsanaykillapa, yumbay rikashuqkuna Tayta Dyusta alabananllapa.

**Jisukristupi kriyishpaqam, mushuq
bidayuqna kanchiqllapa**

¹²Kriyiq masitakuna, noqa Pabluta karsilawaptinllapam, mas achka runakuna, warmikuna *Jisuspa shumaq nutisyanda uyashqallapa. ¹³Chaq gubyirnu *Sesarpa yumbay kwidakuq suldadunguna, kay atun llaqtapi yumbay tiyaqkunapismi yach'anllapan: Pablutaqam karsilashqallapa, Jisukristupaq yach'achikuptin, nishpa. ¹⁴Kanan kay karsilpi kashpa, mana nimata manchashpachu, Jisukristupaq yach'achikuptiyi, ancha achka kriyiq masinchiqkunapis, manana manchashpachu, Jisukristupaq masta yach'achikuykan.

¹⁵Allibmi wakingunaqa imbidyawashpa, munashpa binsiwayta, Jisukristupaq yach'achikuykan. Piru suqkunaqam, allin shunqoyuq kashpa, munashpa yanapawayta, Jisukristupaqa yach'achikuykan. ¹⁶⁻¹⁷Payku-naqam kuyawashpa, yach'anllapa: Tayta Dyusmi Pabluta numbrashqa, shumaq nutisyanda yach'achikunan. Chaymi karsilpina kidashqa, nishpa. Chay imbidyawakaqunaqam Jisukristupaq yach'achikushpaqa yuyanllapa: Pablu karsilpi kaptinqar piñachishun, paypa rrimplasun yach'achikushpa, nishpa. ¹⁸Piru manam piñakunichu. Chaqa allin shunqoyuq kashpa, ichu mana allin shunqoyuq kashpapismi, Jisukristupaq yach'achikuykanllapa. Chaymi ancha kushikuni. Kanan mastam rini kushikuq, ¹⁹qamkuna Dyusman noqapaq mañakuptiki, Jisukristupa *Santu Ispiritun yanapawaptin washakanapaq. ²⁰Piru wañushpa ichu kawsashpapis, ancha

munani Jisukristupaq yach'achikuyta, mana nimatapis penqakushpachu ni manchashpachu, achka runa, warmi payta alabananllapa.²¹ Chaqa kawsashpaqam, kay bidapi Jisukristuta rini alabaq. Piru wañushpaqam, suq bidapiqa paywan kawsashpa, rini alabaq. Chaymi noqapaqqqa alli kanman wañunaypaq.

²²Piru manaraq wañushpaqam, mastaraq atiyman Jisukristupaq yach'achikuyta. Chaymi mana yach'anichu: Mayqanmi mas allin, kawsanaypaqraq ichu wañunaypaqna, nishpaqa.²³ Chaqa noqapaqqam allina kanman wañunaypaq, Jisukristuwanna kanaypaq. Piru noqaqam mana yach'anichu: Mayqanmi mas alli, nishpa.²⁴ Chaqa qamkunapaqqqa mas alli kanman kawsanaypaqraq, Jisukristupaq mas allita qamkunata yach'achishunay.²⁵ Chaymi yuyakuni: Rinim kawsaqraq, qamkunata animachishunay, kushikushpa, mas allita Siñurninchiqpi kriyinaykillapa, nishpa.²⁶ Chaymi Jisukristu kay karsilmanda surqowaptin, mushuqmanda qamkunawan karinaypaqqa, ancha kushikushpa, payta ringillapa alabaq.

²⁷Piru mastam rrugaykillapa, Jisukristu nishqanshina kawsanaykillapa. Chayshina kawsaptikillapaqam, qamkunaman shamushpa ichu mana shamushpapis, rini yach'aq: Suq yuyaylla mana shaykuq yanapanakuykan, *Jisuspa shumaq nutisyanda yach'achikushpa, nishpa.²⁸ Chaqa Tayta Dyusmi rin yanapashuqllapa, chay kuntrashuqkunata ama nimatapis manchanaykillapa. Chaymi chay kuntrashuqkunaqa rinllapa yach'aq: Jisuspi mana kriyishpaqam, rinchiqllapa chinga, nishpa. Piru qamkunaqam ringillapa yach'aq: Dyusmi rin washawaqchinchiq, nishpa.²⁹ Chaqa

ancham balin qamkuna Jisukristupi kriyinaykillapa. Piru ancham balimbis chayshina kriyishqaykirayku, qesachadu kashpa, ñakanaykillapa.³⁰ Chaymi kananqa qamkunapis noqashina Jisukristupaq yach'achikuptiki, payta kuntraqkuna qamkunatapis qesachashungi. Manchu qamkunapa pullayki kashpa, qesachadu kaptiy rikawarqaykillapa. Kanan qamkunaqam yach'angillapa: Pabluqam karsilpi ancha ñakashhpapis, Jisukristupaq mana shaykuq yach'achikuykan, nishpa.

Jisukristushinar umildi kashunllapa

2 ¹Manchu Jisukristupi kriyiptikiqa, payqa qamkunata ancha animachishungi. Ancha kuyashushpam, tukuy imapi qamkunataqa kunswilashungi. Paypa *Santu Ispiritumbismi qamkunata tukuy imapi yapachashungi. Tayta Dyuspismi ancha kuyashushpa, llakipashungi.² Chayri qamkunapis kuyanakushpa, suq yuyaylla kashpa, suqwan suqwan ancha shumaqta kawsayllapa, masta kushichiwanayki.³ Amar palanganuqa kayllapachu. Amar rurayllapachu qamlla munashqaykitqa. Ashwan umilidi kashpa yuyayllapa: Suqkunaqam ancha balin maski noqamanda, nishpa.⁴ Amar yuyayllapachu qamkunapaqlaqa. Ashwan suqkunapaqpis yuyayllapa: ¿Imam mas alli paykunapaq? nishpa.

⁵Chayri qamkunapis Jisukristu yuyashqanshinalla yuyayllapa.⁶ Manchu payqa sylipi Tayta Dyuswan kashpaqa, Taytanshina ancha baliq kamachikuq Dyus karqan. Piru manam nirqanchu: "Taytayshinallam kashaq", nishpaqa.⁷ Ashwanmi tukuy imata dijashpa, kay mundupi nasirqan, umildi yanapakuq runa kanambaq.⁸ Chayshina umildi runa kashpam, Tayta Dyusta tukuy imapi kasushpa, suq kruspi penqakuy-

paqta wañurqan. ⁹Chayshina wañuptinmi, Tayta Dyusqa kawsachi-mushpa, ancha pudirniyuq kamachi-kuqta rurarqan, yumbay awturidar-manda mas kamachikuq kanambaq. ¹⁰Chaymi sylipi yumbay kaqkuna, kay pachapi yumbay tiyaqkuna, kay pachapa warambi yumbay kaqkunapis Jisuspa ñawpambi rinllapa qonqorikuq, payta rrispitashpa. ¹¹Chayshina qonqorikushpaqam, yumbaya ñawpambi ninqallapa: “Jisukristum tukuy ima kaqpa kamachikuqni”, nishpa, Tayta Dyustapis alabananllapa.

Jisuspi kriyikunaqam michakunashina

¹²Ancha kuyashqay kriyiq masita-kuna, noqa qamkunawan kashpa kunashuptiymi, tukuy tyimpu allita kasuwarqaykillapa. Kanan qamkunama manda karupi kaptiyipisri, allita kasuwayllapa. Umildi kashpa, imashinapis kamakayllapa washakanayki. Chayri manchayllapa: Uchata rurashpakish, Dyusmanda akrakayman, nishpa. ¹³Piru Dyus kikinmi qamkunata animachishungi, pay munashqanda qamkunapis munanaykillapa. Chaymadaqam yanapashungillapa, chay munashqanda ruranaykillapa.

¹⁴Chayri ama kijakushpachu ni anyanakushpachu, tukuy imata shumaqta rurayllapa, ¹⁵⁻¹⁶Dyuspa mana uchayuq wambranguna kanaykillapa. Chaqa chayshina kay mundupi ancha uchayuqkunapa ukumbi kawsaptikilla-paqam, paykunapis animakanmanllapa, Dyusta kasunanllapa. Chaqa paykunaqam uchangunarayku tutayaqpishina kawsaykanllapa. Piru qamkuna Dyuspa kawsachikuq nutisyanda paykunata yach'achishpaqam, lusirukanashina llipyaykangillapa paykunapaqqa. Chaymi Jisukristu shamuptinqa, noqaqa ancha rini kushikuq qamku-

napaq: Manam yanqachu chay Filipusmanda kaqkunata yach'achishqa kani, nishpa. ¹⁷Kanan qamkuna Jisuspi allita kriyishpam, Dyusta allita kasushpa, kawsaykangillapa. Chaymi noqaqa ancha kushikuni, yawarniyya ich'ashpa, wanchiwanan kaptinllapapis. Chaqa suq animal ufrindapaq wanchish-qandashina munaptinllapa wanchiway-tapismi, kushikushpa qamkunata animachiyyillapa. ¹⁸Chayshinallar qamkunapis kushikushpa, noqata animachiwayllapa kushikunaypaq.

Pablum yuyarqan kach'ayta Ipafrudituta Timutiyutapis Filipus llaqtaman

¹⁹Siñurninchiq Jisus munaptinmi, utqa kach'amushaq qamkunaman kriyiq masinchiq Timutiyuta. Chayshina qamkunamanda kutimushpa willawaptin: “Kayshinam chay Filipus llaqtapi kawsaykan”, nishpaqam, noqaqa ancha rini kushikuq. ²⁰Manam kanchu suq yach'achikuq masiy kay Timutiyushinaqa. Chaqa payqam noqashinalla yuyashpa, ancha munan qamkunata yanapashuyta, allita rurashpa, kawsanaykillapa. ²¹Piru achka yach'achikuqqam paykuna munash-qandalla ruranllapa. Manam ruranllapachu Jisukristu munashqandaqa. ²²Piru qamkunaqam allita yach'angillapa: Masanchiq Timutiyum ancha allita Pabluta yanapashqa, nishpa. Chaqa payqam churiyshina noqawan pulla *Jisuspa shumaq nutisyanda ancha yach'achikushqa. ²³Chaymi munani qamkunaman kach'amuyta. Piru puntatam munani yach'ayta: ¿Imam rin pasawaq? nishpa. Chay yach'ashqay urasmi Timutiyutaka rini kach'amuq. ²⁴Piru yuyakunim: Jisukristum yanapawanqa, kay karsilmanda lluqshishpa, utqa shamusnaypaq watukushuqlalla. ²⁵Munanim kach'amuyta kuyashqay kriyiq masinchiq Ipafruditutapis. Chaqa

qamkuna kikikim payta
kach'amurqayki, noqata yanapawa-nambaq. Payqam ancha allita yanapa-waykan, *dyabluta binsishpa, Jisuspaq yach'achikunaypaq.²⁶⁻²⁷ Piru payqam ancha qeshyaq kashpa, wañuykarqanna. Chaymi chaypaq yach'aptikillapa, payqa ancha llakishpa nirqan: "Chay kriyiq masiykunach'i noqapaq anchana llakiykanllapa", nishpa. Chayraykum ancha munashqa shamuyta qamku-naman. Allibmi payqa ancha qeshyaq karqan. Piru Tayta Dyusmi payta, noqata llakipawashpa, yanaparqan kach'akanambaq, ama ashwamba llakinaypaq.²⁸ Chaymi Ipafruditu ancha munaptin rikashuyllapata, kach'amuykani, payta rikashpa kushiku-naykillapa, noqapis amana paypaq llakinaypaq.²⁹⁻³⁰ Chayri pay qamkunaman ch'ayamuptinqa, ancha kushikushpa, payta ancha rrispitashpa, Jisuspa shutimbi shumaqta ch'ayachiyllapa. Chaqa payqam yach'ashpa: Chay karsilpiqam atini wañuyta, nishpapis, kayman shamurqan yanapawanambaq. Chaymi yaqqa wañurqan. Chaqa qamkunaqar karu llaqtapi kashpa, mana atirqaykillapachu yanapawayta.

Jisukristupi ancha allita yuyakushun

3 ¹Kriyiq masitakuna, Siñurninchiqpi allita yuyakushpa, kushikushpa kawsayllapa. Manam shaykunichu kayshina achka kutinda qamkunata kunashunaypaqqa. Chaqa chayshina Jisukristupaq allita yach'aptikiqam, mana pipis ingañashunqachu.² Chayri kwidakayllapa yumbay mana baliq yach'achikuqmanda. Paykunaqam dañachikuq allqokunashina. Chaqa yach'achikunllapam: *Kwirpumbi siñalniyuq kaqkunallah Dyuspa wambrangunaqa, nishpa. Manam

chayshinachu.³ Ashwanmi Dyuspa *Santu Ispiritun yanapawaptinchiq, noqanchiqkunaqa Dyusta adurashpa, Jisukristupi kriyishpa, Dyuspa wambrangunaqa kanchiqllapa. Chaymi kushikunchiqllapa. Mananam kriyinchiqllapachu: Kwirpumbi siñalta rurashpa ichu suq kustumbriskunata rurashpam, Dyuspa wambranguna kanchiqllapa, nishpa.⁴ Piru Jisuspi manaraq kriyishpam, noqapis ancha pandarqay. Chaqa yuyarqaymi: Kwirpuypu siñalniyuq kashpa, *isrraylinukunapa duktrinanda kasushpam, noqa kikiylla atini washakayta, nishpa. Kanan yumbay isrraylinumandam noqa masta yuyakurqay chay kustumbriskunapiqa. Manam pipis binsiwaqchu.⁵ Chaqa 8 diyasniyuq kaptiyimi, kwirpuypu siñalta rurarqanllapa. Chaymi ancha lijitimu isrraylinu kani. Taytay, mamay, agwiluykunapismi *Isrrayilmadalla karqanllapa. Chaqa chay alma Binjamimba *atun ayllunmandam kani.⁶ Farisiyukunapa duktrinandam ancha allita sigirqay. Chaymi *Muysispa liyningunata ancha allita kasurqay.⁷ Chayshina ancha allita kasushpa kawsaptiyimi, mana pipis atiqchu anyawaytaqa. Kanan chay liykunapi yuyakushpam, Jisuspi kriyiqkunata ch'iqnishpa, ancha sesacharqani.⁸ Piru kananqam Jisukristupi kriyishqayrayku, tukuy chay rurashqaykuna noqapaqqa manana balinchu.⁹ Chaymi bidaypi Jisukristu tukuy imamanda noqapaqqa masta balin. Chayraykum noqapaqqa tukuy chay munashqaykunata dijashqana kani, Siñurniy Jisukristuta yuyayniypi mas allita riqsinaypaq. Chaymi chay munashqaykunaqa noqapaqqa ancha millanaypaq mapashinana kidashqa,⁹ Jisukristuta masta kuyanaypaq. Chayraykum manana kriyinichu: Muysispa liyningunata kasushpam, atini

washakayta, nishpaqa. Ashwanmi yach'aní: Jisukristupi allipta kriyiptiymi, Tayta Dyus yumbay uchaykunamanda pirdunawan, nishpa. ¹⁰Chaymi Jisukristuta yuyayniypi riqsishpa, paypa pudirninwan Dyusta kasushpa, munani kawsayta, Jisukristushina padisinaypaq. Chaqa Tayta Dyusmi paytaqa wañushqanmanda kawsachimurqan. Chayshinam noqapis munani yanapawanambaq, payta allita kasunaypaq, awnki Jisustashina noqata wanchiwaptinllapapis. ¹¹Chayshina munaptinllapa wanchiwaytapismi, Dyuspi yuyakuni: Suq diyam noqatapis rin kawsachiwaq, nishpa.

Pablum munarqan Jisusta allita kasuya

¹²Manam ninichu: Jisukristushinam kani, nishpaqa. Chaqa noqaqam yach'aní: Manaraqmi payshinachu kawsani, nishpa. Piru payqm washawashqa, payshina kawsanaypaq. Chaymi tukuy ima atishqayta rurani, pay munashqanshina kawsanaypaq. ¹³Kriyiq masitakuna, noqaqam mana ninichu: Jisukristu munashqanshinallam kawsaykani, nishpaqa. Piru tukuy ima chay unay rurashqaykunataqam dijashqana kani. Kananqam tukuy ima atishqayta ruraykani Jisukristu munashqanshina kawsanaypaq. ¹⁴Chaqa Tayta Dyusmi kumbidawanchiq, syluman apawaqninchiq, primyunchiqa qowananchiqllapa, Jisukristuta mana shaykuq sribintinchiq. Chaymi noqaqa tukuy ima atishqayta ruraykani, chay primyuta ch'askinaypaq.

¹⁵Chayrayku Jisuspi yumbay ancha allita yuyakuqkuna chay nishushqayshina yuyashunllapa. Wakinnikikuna suq layata yuyaptikiqam, Tayta Dyus rin intyindichi-shuq. ¹⁶Piru yumbay yach'akushqanchiqta mana shaykuq kasushunllapa, suq duktrinayuqla suq yuyayniyuqla kashpa.

¹⁷Kriyiq masitakuna, qamkunawan kashpa shumaqta kawsaptiyimi, allita rikawarqaykillapa. Chayri kananqa noqashina, chay suq kriyiq masinchiq-kunashina qamkunapis Dyusta allita kasushpa, kawsayllapa. ¹⁸Piru achka runakunam Jisukristuta kuntrashpa, mana kriyinllapachu: Paymi kruspi wañushpa, atin washawayninchiqta, nishpa. Chaymi noqa waqashpa, achka kutinda qamkunata kunashushqayshina, suq kutinda niriykillapa: "Chay kuntraq-kunataqar ama kasuyllapachu", nishpa. ¹⁹Chay laya runakunataqam Tayta Dyusqa rin chingachiq. Chaqa allip Dyusta mana munashpa kasuytam, paykunapa kwirpun munashqandalla rurashpa kawsanllapa. Penqakupuyaq kusaskunata rurashpapismi, mana penqakushpachu, ashwan alabakanllapa. Kay mundupa yumbay kusasnim-billam yuyanllapa. ²⁰Piru yumbay noqanchiqpaqqam kan suq llaqtanchiq anaq syilupi. Chaymi shuyaykanchiqllapa, Siñurninchiq Jisukristu waqmanda shamanangaman washawananchiq. ²¹Chayshina shamushpam, tukuy laya pudirniyuq kamachikuqta binsishpa, tukuy ima kaqta rin kamachiq. Kay kwirpunchiq wañunambaq kaqtapismi chay pudirninwan rin kambyaq, paypa shumaq kwirpunshina kashpa, amana wañunanchiqllapa.

Jisuspi kriyishpaqa, kushikushunllapa

4 ¹Ancha kuyashqay kriyiq masitakuna, qamkuna ancha kushichiwashpaqam, shumaq primyuy-shina kangillapa. Chaymi ancha munani rikashuyllapata. Kanan ancha kuyashushpam kunaykillapa, Jisuspi mana shaykuq yuyakunaykillapa.

²Kayshinam nini chay kriyiq panisitanchiq Ibudyata, Sintikatapis:

Jisuspi allipta kriyishpaqam, alliyallapa, suq yuyayniyuqla kanaykillapa.
³Ancha allin yach'achikuq masisitu, qamtapismi rrugayki, chay ishkay paninchikunata yanapananayki alliyananllapa. Chaqa paykunaqam noqawan pulla padisishpa, ancha yanapawarqan, Jisuspa shumaq nutisyanda yach'achikunay. Masanchiq Klimintipismi suq masanchikunawan noqawan pulla chayshina yach'achikurqanllapa. Paykunapa shutingunamat Tayta Dyusqa iskibrish-qana librumbi, tukuy tyimpaywan kawsanamllapa.

⁴Qamkuna Jisukristupi kriyishqayk-rayku, tukuy tyimpaywan kushikuyllapa. Moshuqmandam niriypillapa:
iKushikuyllapa! nishpa. ⁵Qamkunapura tukuy shunqo kuyanakuyllapa, yumbay runakuna warmikuna intyindinambaq: Jisuspi kriyiqkunaqam ancha shumaqta kawsanllapa, nishpa. Chaqa Siñurninchiq Jisukristum sirkana. [Nuta: "sirkana" munan niya ichu: "sirkana tyimpaywan shamunambaq" ichu "sirkanchiqpi payqa", nishpa.]

⁶Chayri ama nimapaq llakishpachu, ashwan Tayta Dyusman tukuy imapaq mañakuyllapa. Chayshina mañakush-paqr, payta pagikuyllapa. ⁷Chayshina Jisukristupi allita kriyiptinchiqmi, Tayta Dyusqa ancha kunswilawanchiq, ama ancha llakinanchiqllapa. Piru pay ancha pudirniyuq ancha yach'ayniyuq kaptinmi, noqanchikunaza mana atinchiqchu allita intyindiyta: ⁸Imashinam ancha kunswilawanchiq? nishpa.

Allin yuyayniyuqlar kashunllapa

⁸Kriyiq masitakuna, kay nishushqayta ushyanapaqmi kunaykillapa, allin kusaskunapilla yuyanaykillapa. Chayri yuyayllapa tukuy ima allip kaqpilla,

allita ruraqpilla, suqkunata rrispitaqpilla, mana nima uchayuq kaqpilla, allin famayuq kaqpilla. Chaqa ima kaptin kushikunanchiq, ichu allin runakuna kaptin, paykunata alabananchiq, chay shumaq kaqkunapilla yuyayllapa.

⁹Yumbay yach'achishushqayta allita rurayllapa. Chaqa Dyuspaq yach'achikuptiymi, qamkuna allita uyawarqayki; allita ruraptiymi, qamkuna allita rikawarqayki. Chayri qamkunapis chayshinalla allita rurashpa kawsayllapa. Chayshina kawsaptikillapam, Tayta Dyus kunswilawaqni-chiq qamkunapa pullayki rin kaq.

Pablam pagikurqan filipusinukunata

¹⁰Suq tyimpupi qamkuna ancha yanapawayta munashpapismi, mana atirqaykillapachu ufridaykita kach'amuwayta. Piru kananqam noqata yuyawashpa, ufridaykita kach'amuwashqa kangillapa. Chaymi noqa ancha kushikushpa, Siñurninchiq Jisukristuta ancha pagikuni. ¹¹Piru chayta nishushpaqam, mana nimatapis mañaykillapachu. Chaqa mana nimayuq kashpa ichu achka imayuq kashpapis, yach'akushqana kani kushikuya.

¹²Chaymi achkata mikushpa ichu ashlitata mikushpapis kushikuni. Achka imayuq kashpa ichu mana nimayuq kashpapismi, yach'akushqana kani kushikushpalla kawsayta. ¹³Chaqa Jisukristu yanapawaptinmi, tukuy imata atini rurayta. ¹⁴Piru padisiptiyqam, qamkuna yanapawashpa, ancha allita rurashqallapa kangi.

¹⁵Filipusinu kriyiq masitakuna, qamkunaqam allita yach'angillapa: Pabluqam *prubinsyanchiq Masiduñamaña suq llaqtakunaman rirqan, Jisuspa shumaq nutisyanda yach'achikuq, nishpa. Chay llaqtakunaman riptyimi, qamkunalla

yach'achishushqaypaq agradisiwashpa, ufrindakunata kach'amuwarqayki.

¹⁶Chaymandaqam Tisalunika llaqtapi kaykaptiy, kutin kutin ufrindakunata noqaman kach'amurqayki mantyinikanaypaq. ¹⁷(Tukuy chaykunapaqmi ancha pagikuykillapa.) Piru manam mañaykillapachu, mas ufrindakunata noqaman kach'amunaykiqa. Ashwanmi chay ufridaykita qowashqaykirayku, munani Tayta Dyus suq shumaq primyuta qamkunata qoshunambaq.

¹⁸Chaqay chay ufrinda Ipafrudituwan qamkuna kach'amushqaykitam ch'askishqa kani. Chaymi ufridaykilla pa ancha yanapawaptin, mana nimapis faltawanchu. Chay ufridaykita kach'amuptikim, Tayta Dyusqa ancha kushikushqa. Chaqa paypaqqam suq *mishki mutkina *insinsyushina kashqa.

¹⁹Kanan payqam Churin Jisukristuwan tukuy imayuq kashpa, syilumanda ancha achkata rin qoshuqlapa, ama nimapis faltashunanllapa. ²⁰iTaytanchiq Dyusqam tukuy tyimpupaq alabashqa kanqa! iChayshina kanqa!

Pablum dispidikarqan

²¹Yumbay kriyiq masinchikunata niyllapa: “Pablum Jisukristupa shutimbi qamkunata napaykushungi”, nishpa. Noqawan kaypi kaq kriyiq masinchikunapismi qamkunata napaykushungi.

²²Yumbay kriyiq masinchiqpismi qamkunata napaykushungi. Piru yumbaymandam masta napaykushungi gubyirnu Sesarpa wasinmanda kaqkuna.

²³Siñurninchiq Jisukristu tukuy imapi qamkunata yanapashunqa. Chayshina kanqa.